

Date – 11/10/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. A damloh avanga Hyderabad-a inenkawl Governor Dr. Hari Babu Kambhampati chu nimirpiah khan Mizoram a lo let a, vawiin khan Chief Minister Pu Lalduhoman chuan a chenna Raj Bhavan-ah a kan.
2. Chief Minister Pu Lalduhoman Mizorama tuialhtheih man tihsan chu sut leh a nih tur thu a sawi a, Mizoram a kawngpui chhia te ngawrh zawka siam a ni ang a ti bawk.
3. Prime Minister Narendra Modia chuan South China Sea-a remna, muanna leh venhimna tha chu Indo-Pacific chhehvel ram zawng zawngte duhthusam a ni a ti.
4. Japan-apawl pakhat Nihon Hidankyo chu kum 2024 Nobel Peace Prize dawng tura thlan an ni.

<><><>

### GOVERNOR

Hun engemawchen damlohna avanga Hyderabad-a inenkawl Governor Dr. Hari Babu Kambhampati chu nimirpiah khan Mizoram a lo let a, vawiin khan Chief Minister Pu Lalduhoma chuan a chenna Raj Bhavan-ah a kan.

Chief Minister hian dam taka a lo kir leh avangin lawmpuina a hlan a. Hriselna tha nei zel turin duhsakna a hlan a ni.

Governor hian, a inenkawlina kawngah Chief Minister-in a mamawh apiang a ngaihtuhsak avangin lawmthu a lo sawi a. Hma a sawn zel thu a hrihl a ni.

<><><>

### RTI WEEK

Hapta khat awh tur, Right to Information chungchang thehlar tura hmalakna, RTI Week chu vawiin khan Minister Dr.Vanlalhlana'n Aizawlah a hawng a.

Thusawiin Minister chuan mipuiten dan hmanga ram hruaitu thlan tlin te vil zui a pawimawh thu sawiin sawrkar vil chu eptu party chauh ni lovin mitin mawhpurhna a ni a ti a. RTI Act chu Sorkar inrelbawlina tha zawk democracy tichanglungtu ni se a duh thu sawiin sawrkar khalh ngil a, a hnathawhte fimkhur tirtu ni zel se a duh thu a sawi a. Sawrkar chuan vengtu

tha a neih chu thil pawimawh tak a nih thu sawiin hriatna chu chakna a nih anga huaisen taka thil an tih theih nan information data dik leh tha neih a pawimawh tih a sawi.

Kumin hian a vawikhat nan RTI Excellence Award 2024 sem a ni a, Mizoram Public Service Commission (MPSC), General Administration Department (GAD) leh Department of Personnel and Administrative Reforms (DP&AR) ten lawmman la in Consolation Prize Administrative Training Institute (ATI) leh Information Communication Technology (ICT) ten an dawng a ni.

RTI Week pual hian vawiin khan Lungleiah Deputy Commissioner Office bultumin RTI Week hi DC Conference Hall ah hawn a ni a. Addl. Deputy Commissioner Pu James Miahlung chuan he hun hi a hmanpui. RTI hman tangkai dan leh hmansual chungchang sawiho a ni.

Champhai ah chuan I&PR Auditorium ah Pu Ngulzathuama, SDO kaihhruaiin hun hman a ni a. Pu Lalchhuanawma Ralte, DIPRO chuan RTI Act chungchang inhrilhriatna neiin zawhna leh chhanna hun hman a ni.

Serchhip Additional DC Pu Lalrinzuala hovin RTI Week hawna hun hi Serchhip DC Pisapui Hall ah neih a ni a. Addl SP Pu Saidingliana Sailo chuan RTI nihphung sawifiahin mipui ten tangkai taka an hman theih dan a sawi.

RTI Week hawna hi Kolasib DC Conference Hall – ah Addl DC Pi B. Malsawmtluangi ho a neih a ni a. Pu David A. Lalhmingchhuanga, Kolasib DIPRO chuan RTI chungchang zirtirna pe in Kolasib District chhunga sorkar pisa hrang hranga SPIO leh ASPIO te an tel a ni.

Mamit district ah pawh RTI Week hawna hi Addl DC Pi Carolyn LB Khiangte ho a hman a ni a. Addl DC chuan SAPIO, SPIO leh department aiawh lo kalte chu mipui rawngbawl nan RTI tangkai taka hman turin a chah a ni.

District dangte rualin Lawngtlai Bawrhsap Pu Cheemala Siva Gopal Reddy hovin Lawngtlaiah RTI Week hi hman a ni a. Sawrkar department hrang hranga SPIO, SAPIO bakah NGO leh VC aiawh kalkhawmte chu RTI chungchang hrechiang tura chahin zawhna leh chhanna hun hman a ni.

Khawzawl ah pawh RTI Week hawna hun hi Khawzawl Deputy Commissioner, Pu K. Vanlalthiana hova hman a ni a. SDO (Sadar), Pu Suvigya S. Chandra chuan RTI chungchang sawiin Khawzawl district a SPIO leh SPIO, Village Council member, NGO leh zirlai naupang thahnem tak an tel a ni.

Hnahthial Bawrhsap, Pi Rita Lalnunmawii Pachuau hovin Hnahthial DC Conference Hall ah RTI Week hi hman a ni a. RTI puala inzirtirna hun hman a ni.

<><><>

## GOVT TO REVOKE FUEL PRICE HIKE

Chief Minister Pu Lalduhoman Mizorama tuialhtheih man tihsan chu sut leh a nih tur thu a sawi a, Mizoram a kawngpui chhia te ngawrh zawka siam a nih tur thu a sawi bawkw avangin Mizoram Commercial Vehicle Union chuan karleh thawhtanni atanga lungawilohna lantir an tum chu an thulh.

Vawiin khan Commercial Vehicle Union hruaitute hian Chief Minister Pu Lalduhoma an hmu a, hemi chungchanga MCVU thuchhuah tarlan danin, Chief Minister chuan Mizoram Commercial Vehicle Union (MCVU) ten Oil man sang ti hniam tur leh Kawngchhia siam hmanhmawh tura an ngenna chu Cabinet meeting hmanhmawhthlak kovin karleh Nilaini ah an rel dawn tih

sawiin tualhthei man sut tura Cabinet thu chhuak nghak turin a ti a, hemi hnuah hian oil man hi a chiang dawn ni a ngaih a ni.

Vawiina an inkawmnaah hian Mizoram chhunga State PWD chan zawng ah kawngsiam chak taka hmalak nise an ti a, a chhe zualpui ah sawrkar hmalakna mek bak ah Company hrang hrang ten an chan chin ah chak taka hma la turin Chief Minister chuan a hriattir dawn a ni.

<><><>

## **PWD MINISTER**

PWD Minister Pu Vanlalhlana chuan Mizoram sawrkar chu kal phung thar sawrkâr anih tawh avangin NH-06 pawh tun hma ang mai maia dawngdaha enkawl a rem tawh lo a ti.

Vawiin khan PWD Minister hian National Highway-06 huam chhûnga Khamrang leh Kawnpui inkar kawng siam mêk chu a hmunah a tlawh leh a. PWD Minister chuan kawng siam chu chak taka kalpui tur leh hetih rual hian mipuite harsatna thlen lo thei ang bera hna thawk turin thawktute a fuih a, NH-06 Kawnpui leh Khamrâng inkar chu Mizoram mamawh lâkluhna hnukpui a nih avângin a chhe rei thiang lo a, chak taka siam a ÷ul a ni, a ti.

Pu Vanlalhlana chuan, Contract hna reng reng, kawng siam a ni emaw thil dangah pawh dawngdah taka hna thawk thinte sawrkârin a dim dawn lo a ti baw a, Mizoram State Project Monitoring Committee-te mit tlung lova hna thawkte chu an phu tawka an chung thu ngaihtuah a ni zel dawn a ni, a ti.

Pu Vanlalhlana chuan, tun dinhmunah NH-6 hi duhthusamin siam hlei thei lo mah se, lirthei engpawh kal theiin enkawl chhunzawm mek a ni a, Mizoram chak lakna kawng ber a nih avangin englaipawha lirthei kaltlang theiha enkawl chhunzawm zel hi sorkar chuan a tum tlat a ni, a ti.

Kuminah Mizoramin fur a tawrh nasat thu leh ruah tui tlak chhung a rei thu sawiin, tunah hian Aizawl khawpui hmun hrang hrangah kawng chhe zual thawm that mek a ni a, ruah tui tla tam han ziaawm se a aia tha lehzuala kawng thawm thata siam a ni zel dawn a ni', a ti.

<><><>

## **CONSERVATION OF RIVERS**

Luia nungcha leh sangha chi hrang hrang te an inthlah pun hunchhunga, tihchhiat leh tihbuai an nih loh na turin leh, him taka an inthlahpun theih nan sangha leh nungcha man khap rih a ni a,

Khapna thupek hi Governor chuan tichhuakin The Mizoram Fisheries Act, 2002 section 5(1) leh (2) behchhanin, Tun thla Oct ni 10 atanga December ni 10 thleng sangha leh nungchate man khap a ni a, nungcha tihhlum a, an chenna leh nunphung tih buai chu khap tlat a ni.

Luidung nungcha humhalh bikte hi Nghalim, Nghadawl, Lengphar te an ni a, Autonomous District Council huamchhung tel lovin Mizoram chhunga Lui leh Luite zawng zawng ah khapna thupek hi kenkawh a ni a, dan bawhchhia chu hrem tur an ni.

<><><>

## WORLD HOSPICE & PALLIATIVE CARE DAY

World Hospice & Palliative Care Day chu Directorate of Hospital & Medical Education Conference Hall, MINECO-ah vawiin khan hman a ni a. DHME Director Dr.Lalthlenglianin he hun hi a hmanpui.

Palliative Care in a tum ber chu natna benvawn hrang hrang avanga damlo, dinhmun hniam leh thih hlauhawma ding mek ten rilru hahdam leh zangkhai zawka hun an hman theih nan te, an na tawrh damdawi hmanga chhawk zangkhai sak a nih theih nan bakah anmahni enkawltu an chhungte thlenga nun nuam leh hahdam zawka an awm theih nana hmalakpui a ni.

Palliative Care hi Mizoram-ah National Programme for Palliative Care (NPPC) hmalakna in kum 2016, October thla atang khan kalpui a ni a. Serchhip leh District thar pathum tih loh Mizoram district dang zawng zawngah kalpui a ni tawh a. Thawktu ten Palliative Care Unit-a awmte chauh ni lovin Home Visit neiin damlo te an chenna inah tlawh chhuakin a tul angin damdawi leh hmanrua te nen an buaipui thin a ni. He programme hmang tangkai tur erawh chuan registration tih a ngai ve thung a ni.

NPPC report in a tarlan danin Financial Year 2024-2025 chhung hian Palliative damlo hi mi 2224 en a ni a, damlo 1155 admit an ni. Palliative damlo thar hi 366 an awm a. Home visit tum 301 neih tawh niin Palliative enkawlina dawng chungah in lama thi mi 88 awmin damdawiinah mi 61 an thi bawk. Tunah hian Palliative care mamawhte tan Mizoram State Cancer Institute ah khum 10, Civil Hospital Lunglei ah khum 8 hauh sak reng a ni bawk.

<><><>

PM

Prime Minister Narendra Modia chuan South China Sea-a remna, muanna leh venhimna tha chu Indo-Pacific chhehvel ram zawng zawngte duhthusam a ni a ti. Vawiin East Asia Summit vawi 19-naah he thu hi sawiin PM Modia chuan Indo-pacific-a zalenna, inpawhna, mitin huapzo hmalakna, hausakna leh dan ngaihpawimawhna chu remna leh hmasawna atan a paiwmawh a ni a ti a. Khawvel hmun hrang hranga ram leh ram innghirnghona thleng mek chungchang sawilangin Pu Modia chuan mahni ram chin zauh aiin hmasawna zawk hi ngaihpawimawh hmasak tur a ni a ti a.

Pu Modia chuan tuna khawvel ram indona hian nghawng tha lo tam tak a thlen a, a bik takin khawvel chhim lam ram global south ten an tuar nasa a ti a. Eurasia leh West Asia-a remna thlen tir chu mitin duhdan a ni tih sawiin indo hun a ni tawh loa harsatna awmte indona hmunah niloin dawhkana chinfel tur a ni a ti a. Mi ram zalenna leh thuneihna inzahsak a, khawvelin dan a zam te ngaihpawimawh chu thil pawimawh tak a ni a ti bawk. Pu Modia chuan chhawmdawl ngai pui turte, remna siam tura inbiakna leh dawhkan kilho a nih theih nan India chuan theihtawp a chhuah zel dawn tih a sawi bawk a ni.

**East Asia Summit ah hian Association of South East Asian Nation (ASEAN) ram 10 bakah an thawpui ram pariat Australia, China, India, Japan, South Korea, New Zealand, Russia leh the United States te an tel a ni.**

<><><>

**NOBEL PEACE PRIZE**

**Japanese group Nihon Hidankyo chu kum 2024 Nobel Peace Prize dawng tura thlan an ni. He pawl hi Hiroshima leh Nagasaki-a atom bomb thlak anih tuma damchhuakten an din a ni a. Hibakusha tih pawha hriat niin khawvelah nuclear ralthuam ti bo vek tura hmalatute niin anmahni thiltawn ngei atangin nuclear ralthuam hman nawn anih tawh loh nan hma an la a ni. Nobel Peace Prize dawng tur hi vawiin khan Norweigan Nobel Institute, Oslo-ah puan a ni.**

<><><>